

auch hinweg den Recipient mit dem Wasser/behalts auff ein orth/
 wol verwahrt/dann du wirsts bedörffen/als du am end hörē wirst/
 zu sein Feces/vnnd sein Essentialisch Wasser oder aqua secreta.
 So das Glas/wie gemelt/auß dem Wasser genommen/vnnd er-
 kalt worden/dann nimb die Feces oder vberbliebene Materij/so sie
 vō guter Materij sind/wirt sie roth wie der Lapis Hematites,die-
 selbig reib vñ legs in ein ander Glas/mit sein Recipient/beydsam
 wol verlutiert als wañ man Aquafort distillierē wolt/doch ohn ein
 Alembick/durch ein Kolbē od' Retortē. So es nū zugericht/so gib im
 ein sanfft Fewr ein tag vnnd nacht/den andern tag sterck das was-
 ser vnd halts also starck 8.tag vnnd nacht/so lang biß du den Recis-
 pient wirst sehē voller weisser Spiritus schweben/dann gewißlich
 wirt in den acht tagen ein Wasser herüber gehen. Laß dich die ar-
 beit nit verdriessen biß du das Wasser haben wirst/ob es gleich wes-
 nig am gewicht ist/so ist es doch grosser tugendt/dann dieses letzte
 Wasser ist besser dann das erste. Also hastu aquam secretam,das
 ist heimlich Wasser oder den scharpffesten Essig/welches Wasser
 du wol behalten solt/biß weiter daruon gelehrt wirdt/vnnd so der
 Materij die du enngericht hast 2. Pfund gewesen ist/so hastu zwo
 Unzen aquæ secretæ,oder des Essigs. Das Wortzeichen/das du
 es recht distilliert habest/ist/das die Feces sollen schwarz dahin-
 den bleiben/dañ es ist ein corpus mortuorum vnd sein Seel ist im
 entzogen. Ehe du weit arbitest so merck zuuor die gesagte arbeit/dz
 in der erste distillation die mit dē Alembick geschicht/soll milt seyn/
 mit sanfftem Fewr/biß du die weissen Spiritus sehen wirst/wie
 gesagt ist/so thue das herübergegangen Wasser hinweg/so der
 Materij 4. Pfund gewesen ist/so wirdt des Wassers 2. Pfund ges-
 stigen seyn/ist süß vnnd vieler eigenschafft. Dises Wasser muß
 per se,so oft distilliert werden/biß es keine feces mehr dahinden
 laßt/alsdann so ists purgiert vnd rein/vnd gut zu vilen Arzneyē/
 wie dann vnden auch gemelt wirdt/vom Aceto vnnd Aqua secreta.
 Auß disen zwen Pfund Feces machst wider mit der Retortischen
 distillation zwo Unz aquam secretam,welches von den rothen
 Feces/die darnach schwarz sind worden/distilliert hast/solstu also
 purgieren.

Nimb